



UNIVERSITETI "UKSHIN HOTI"
UNIVERSITY "UKSHIN HOTI"

Universiteti i Prizrenit University of Prizren Univerziteti Prizren "UKSHIN HOTI"	
Pranuar me dt. 09.02.2018	
Zyra e pranimit	Nr. i protokolit
308	01-34

KËSHILLI DREJTUES

Rruga e Shkronjave Nr.1, 20000 Prizren -Kosovë; Tel:+381 (0) 29- 232 140; Homepage: www.uni-prizren.com

Kryesues i Këshillit Drejtues
Prof. asoc. dr. Bedri Muhadri

Nr. i ref. 07-2018

Prizren, më: 09.02.2018

Mbështetur në dispozitat ligjore të nenit 154, paragrafi 3 të Statutit të Universitetit 'Ukshin Hoti' Prizren, sipas referencës nr. 04-V-621, datë 30 maj 2013, Këshilli Drejtues, duke vendosur në lidhje me miratimin e Rregullore për Zgjedhjet e Studentëve në Universitetin "Ukshin Hoti", në mbledhjen e mbajtur me datë **09.02.2018**, miratoi këtë:

RREGULLORE PËR ZGJEDHJET E STUDENTËVE TË UNIVERSITETIT
"UKSHIN HOTI" PRIZREN

Dispozitat e përgjithshme

Neni 1

Kjo rregullore përcakton procedurën dhe organizimin e zgjedhjeve për anëtarët e parlamentit të studentëve dhe të këshillave të studentëve të fakulteteve.

Neni 2

1. Studentët kanë të drejtë të themelojnë organizata studentore të cilave mund t'i përkasin të gjithë studentët e rregullt, studentët me korrespondencë dhe vijuesit e studimeve master.
2. Secila organizatë studentore duhet të ketë statutin e vet të aprovuar nga anëtarët e saj në pajtim me këtë rregullore.
3. Statuti përfshin parimet për mundësi të barabarta dhe mosdiskriminim.

Neni 3

1. Interesat e studentëve do të përfaqësohen në Universitet përmes këtyre organeve:
 - a). Parlamenti i studentëve në nivel të Universitetit;
 - b). Këshillat e studentëve në nivel të secilës njësisë akademike.
2. Organizatat studentore kanë të drejtë të propozojnë anëtarët për parlamentin e studentëve dhe këshillat e studentëve të njësive akademike në bazë të rezultateve të zgjedhjeve në çdo dy vjet.

3. Studentët të cilët kanë të përsëritur vite të studimeve nuk mund të kandidohen, përkatësisht të zgjidhen në pozita udhëheqëse studentore në Universitet.
4. Studentët që janë pjesë e organeve drejtuese të partive politike nuk mund të kandidohen në listat zgjedhore të organizatave studentore.

Parlamenti i Studentëve

Neni 4

1. Parlamenti i studentëve është organ suprem i përfaqësimit të studentëve. Parlamenti merr vendime për çështjet studentore në nivel të Universitetit.
2. Parlamenti i studentëve zgjedh anëtarët e Senatit nga lista e të propozuarve, e përgatitur nga këshillat e studentëve të secilës njësi akademike. Kryetari i Parlamentit të Studentëve është anëtar ex officio nga numri i përgjithshëm i anëtarëve studentë të Senatit.
3. Zgjedhja e anëtarëve studentë bëhet në harmoni me nenin 43, paragrafi 1.5 të Statutit të Universitetit
4. Parlamenti i studentëve duhet të fokusohet në këto tema:
 - Interesat e studentëve në nivel të Universitetit;
 - Angazhimi për cilësinë në mësimdhënie dhe mësimxënie;
 - Studimet që ndërlidhen me aspektet e reformave të Universitetit dhe zhvillimet akademike;
 - Zhvillimin e cilësisë së të mësuarit dhe të vlerësimit;
 - Bursat universitare;
 - Ndihmat (bursat) sociale;
 - Çështjet tjera të përgjithshme të interesave akademike të studentëve;
 - Organizimin e aktiviteteve kulturore e sportive.
5. Parlamenti i studentëve merr vendimet si në vijim:
 - Zgjedhjen e anëtarëve-studentë në Senatin e UPz-së;
 - Zhvillimet e aktiviteteve studentore në kuadër të UPz-së;
 - Propozimet për Senatin e UPz-së, në lidhje me çështjet studentore dhe akademike;
 - Pjesëmarrja në të gjitha komisionet dhe këshillat e UPz-së, ku studentët janë anëtarë sipas statutit;
 - Çështjet tjera të ngjajshme.

Neni 5

1. Numri i tërësishëm i anëtarëve të parlamentit të studentëve dhe këshillave të studentëve është i rregulluar me dispozitat e Statutit të UPz-së.
2. Anëtarët e parlamentit të studentëve zgjedhen nga zgjedhjet e përgjithshme të Universitetit, ku secila organizatë studentore e pranueshme bën fushatë në bazë të listës së kandidatëve.
3. Ndarja e mandateve për secilën organizatë studentore që bën fushatë, varet nga numri i përgjithshëm përqindjes së votave që arrihet gjatë zgjedhjeve sipas kësaj rregulloreje dhe Statutit të UPz-së.
4. Zgjedhjet e parlamentit studentor do të udhëhiqen nga Komisioni zgjedhor.

Këshilli i studentëve

Neni 6

1. Këshillat e studentëve janë organet e përfaqësimit të studentëve në secilën njësi akademike.
2. Çdo këshill i studentëve propozon listën me dy kandidatë për anëtarë-studentë të Senatit për t'u zgjedhur nga Parlamenti i Studentëve.
3. Këshilli i studentëve i çdo njësie akademike zgjedh anëtarët-studentë të Këshillit të njësisë akademike.
4. Çdo këshill i studentëve duhet të fokusohet në këto tema:
 - Interesat e studentëve në nivel të njësisë akademike;
 - Studimet që ndërlidhen me aspektet e reformave të fakultetit dhe zhvillimet akademike;
 - Zhvillimi i cilësisë të mësimit dhe të vlerësimit;
 - Bursat universitare;
 - Ndihmat (bursat) sociale;
 - Çështjet tjera të ngjajshme.
5. Çdo këshillë i studentëve merr këto vendime:
 - Përgatitjen e listës së ngushtë për anëtarët-studentë të Senatit;
 - Zgjedhjet e anëtarëve-studentëve të këshillave të fakultetit;
 - Zhvillimet e aktiviteteve studentore në kuadër të fakultetit;
 - Propozimet për këshillin e fakultetit lidhur me çështjet studentore dhe akademike;
 - Pjesëmarrja në të gjitha komisionet dhe këshillat e fakultetit ku studentët janë anëtarë sipas Statutit;
 - Çështjet tjera të ngjashme.

Neni 7

1. Numri përgjithshëm i anëtarëve të çdo këshilli të studentëve është 1% i numrit të përgjithshëm të studentëve të rregullt të regjistruar në atë njësi akademike, me më së paku 5 dhe më së shumti 21 anëtarë.
2. Përfaqësimi i studentëve në këshillin studentor do të jetë në bazë të përqindjes së numrit të studentëve sipas nivelit të studimeve (bachelor dhe master).
3. Anëtarët e këshillave të studentëve zgjedhen individualisht përmes zgjedhjeve në secilën njësi akademike, ku secila organizatë studentore e pranueshme bën fushatë në bazë të listës së kandidatëve.
4. Ndarja e mandateve për çdo organizatë studentore që bën fushatë, varet nga totali i përqindjes së votave të arritura gjatë zgjedhjeve sipas kësaj rregulloreje.
5. Zgjedhjet për këshilla të studentëve do të udhëhiqen nga komisioni përkatës i fakultetit në bashkëpunim me Komisionin Zgjedhor.

Parimet e zgjedhjeve

Neni 8

1. Regjistrimi i organizatave studentore bëhet në Ministrinë e Administratës Publike, konform Ligjit Nr. 04/L-57 për Lirinë e Asocimit në Organizatat Joqeveritare.

2. Të gjitha organizatat studentore, të cilat janë regjistruar në mënyrë të rregulltë si “shoqatë”-”asociacion” në Ministrinë e Administratës Publike, sipas ligjit në fuqi, konsiderohen të regjistruara, ndërsa themelimi i organizatave regjistrohet së paku 1 (një) muaj para datës së zgjedhjeve.
3. Organizatat studentore kanë të drejtë të regjistrohen për:
 - a. përfaqësim të përgjithshëm të studentëve të Universitetit;
 - b. përfaqësim të studentëve në fakultete individuale.
4. Numri minimal i deklaratave mbështetëse - nënshkruese i nevojshëm për organizatat studentore për të arritur pranueshmërinë përcaktohet në frymën e kësaj rregulloreje.
5. Organizata studentore që marrin pjesë në zgjedhje për herë të parë, për t’u regjistruar duhet t’i sigurojë 500 nënshkrime mbështetëse nga studentët.
6. Në deklaratën mbështetëse shënohet: Emri dhe mbiemri, numri i indeksi (ID), fakulteti, departamenti dhe nënshkrimi.
7. Në rast se konstatohen parregullësitë në plotësimin e shënimeve, Komisioni Zgjedhor mund ta anulojë regjistrimin e organizatës.
8. Data kualifikuese për organizatat studentore, për ta fituar të drejtën e pjesëmarrjes në zgjedhjet studentore, do të caktohet 20 ditë para datës së zgjedhjeve. Procesi i regjistrimit dhe licencimit duhet të përfundojë në atë datë.

Neni 9

1. Anëtarët e parlamentit të studentëve dhe këshillat e studentëve zgjedhen në pajtim me procedurat për zgjedhje parlamentare.
2. Përfaqësimi i studentëve në parlamentin studentor është në bazë të përqindjes së numrit të studentëve sipas nivelit të studimeve (bachelor dhe master).
3. Gjatë zgjedhjeve aplikohet sistemi i përfaqësimit proporcional. Kjo siguron që secila organizatë studentore që ka fituar numrin e përgjithshëm të votave mbi pragu përkatës të arritur, fiton numrin e ulëseve në proporcion me përqindjen e votave të cilat ata i kanë marrë.
4. Limiti (pragu) për nominimin e anëtarëve të organizatave studentore është:
 - 5% numrit të përgjithshëm të votave për Parlamentin e studentëve.
 - 3% të numrit të përgjithshëm të votave në nivel të njësisë përkatëse akademike.

Neni 10

Mandati i anëtarëve të Parlamentit të studentëve dhe i Këshillit të studentëve të njësive akademike zgjat 2 vjet dhe fillon me 1 Tetor.

Neni 11

1. Zgjedhjet e studentëve shpallen nga Këshilli Drejtues i Universitetit.
2. Zgjedhjet e studentëve mbahen brenda (45) ditësh pasi të shpallen zgjedhjet nga Këshilli Drejtues i Universtetit. Data e saktë përcaktohet nga Këshilli Drejtues.
3. Organizatat e studentëve që fitojnë të drejtën për të marrë pjesë në zgjedhjet studentore në nivel universiteti apo fakulteti bëjnë fushatën bazuar në listën prioritare të kandidatëve, gjithnjë duke respektuar nenin 7 al. 2 dhe nenin 9 al. 2 të kësaj rregulloreje.
4. Periudha e fushatës zgjedhore për organizatat e studentëve fillon sipas dinamikës që miratohet nga Këshilli Drejtues. Përfundimi i fushatës bëhet 48 orë para datës së zgjedhjeve, duke e llogaritur kohën që nga ora 00:00 e ditës së shpalljes së zgjedhjeve.

5. Shkeljet e rregullave dhe procedurave zgjedhore, sanksionohen nga Komisioni Zgjedhor dhe Këshilli Drejtues si shkallë e dytë.

Komisioni Zgjedhor dhe komisionet e fakultetit

Neni 12

1. Këshilli Drejtues emëron Komisionin Zgjedhor me vendim. Mbledhja e parë konstitutive udhëhiqet nga Kryesuesi i Këshillit Drejtues dhe mbahet brenda pesë ditëve pas datës kur janë shpallur zgjedhjet e studentëve. Kryesuesi i Komisionit Zgjedhor merr përsipër udhëheqjen pas zgjedhjes së tij/saj.
2. Komisioni Zgjedhor përbëhet prej këtyre anëtarëve:
 - 2.1 Sekretari i përgjithshëm i Universitetit (me të drejtë vote),
 - 2.2 Një përfaqësues nga Ministria e Arsimit, Shkencës dhe Teknologjisë me kompetencat përkatëse ligjore (me të drejtë vote), dhe
 - 2.3 Nga një përfaqësues prej 2 organizatave më të mëdha studentore në kuadër të votave të fituara në zgjedhjet e fundit (me të drejtë vote)
 - 2.4 Një përfaqësues i KQZ-së të Republikës së Kosovës (me të drejtë vote).
3. Kryesuesi i Këshillit Drejtues duhet të dërgojë kërkesë me shkrim, për të marrë emrat e nominuar nga organizatat nominuese sipas paragrafit (3) të këtij neni, që në ditën e shpalljes së zgjedhjeve. Kjo shkresë duhet të ju dërgohet së bashku me një ftesë për mbledhjen konstituive. Nominimet duhet të dorëzohen me shkrim te Kryesuesi i Këshillit Drejtues, më së voni një (1) ditë para mbajtjes së mbledhjes konstituive. Nominimet e vonuara nuk do të bëjnë pezullim të procedurave.
4. Sekretari i Përgjithshëm është kryesues i Komisionit Zgjedhor sipas detyrës zyrtare. Zëvendëskryesuesi zgjidhet nga anëtarët studentë të Komisionit Zgjedhor.
5. Komisioni Zgjedhor është përgjegjës për përgatitjen, udhëheqjen dhe mbarëvajtjen e zgjedhjeve studentore.
6. Rezultatet e zgjedhjeve shpallen ekskluzivisht nga Komisioni zgjedhor.
7. Komisioni zgjedhor aprovon Rregulloren e punës të Komisionit Zgjedhor, të komisioneve të fakulteteve dhe udhëzimet për votim, me propozim të kryesuesit të komisionit brenda 2 javëve pas konstituimit.

Neni 13

1. Për secilin fakultet të UPz-së, themelohet komisioni i zgjedhjeve nga Komisioni Zgjedhor brenda pesë ditëve pas themelimit.
2. Komisioni i fakultetit përbëhet prej këtyre anëtarëve:
 - 2.1 Sekretari i fakultetit
 - 2.2 Dy anëtarë nga stafi i administratës (me të drejtë vote)
 - 2.3 Nga një përfaqësues prej 2 organizatave më të mëdha studentore në kuadër të votave të fituara në zgjedhjet e fundit (me të drejtë vote)
 - 2.4 nga një anëtarë nga secila organizatë pjesëmarrëse në zgjedhjet studentore si vëzhgues të procesit zgjedhor (pa të drejtë vote).
3. Emërimet e anëtarëve të Komisionit të fakultetit i bën KQZ në koordinim me menaxhmentin. Nominimet dorëzohen me shkrim të Kryesuesi i Komisionit zgjedhor me së voni tri ditë para mbajtjes së takimit konstituiv. Nominimet e vonuara nuk e bëjnë pezullim të procedurave.
4. Sekretari i Fakultetit është kryesues i Komisionit Zgjedhor sipas detyrës zyrtare. Zëvendëskryesuesi zgjidhet nga anëtarët studentë të Komisionit Zgjedhor.

5. Komisioni i fakultetit e përkrah Komisionin Zgjedhor në përgatitjen, udhëheqjen dhe mbarëvajtjen e zgjedhjeve studentore në fakultetin përkatës.

Neni 14

1. Asnjë student nuk ka të drejtë që të jetë anëtar i më shumë se në një komisioni.
2. Asnjë student nuk ka të drejtë që emri i tij të jetë në më shumë se në një listë të kandidatëve.
3. Anëtarët të cilët janë caktuar në Komisionit Zgjedhor sipas nenit 12 paragrafi 2 pika 2.5 si dhe anëtarët/përfaqësues sipas nenit 13 paragrafi 2.3 në komisionet e fakultetit nënshkruajnë një deklaratë me shkrim, e cila përgatitet nga Kryesuesi i Komisionit zgjedhor e cila thotë se ata/ato do të punojnë gjatë mandatit të tyre me përpikëri në mënyrë të paanshme dhe me ndërgjegje të plotë.
4. Këshilli Drejtues ka të drejtë që përkohësisht të suspendojë anëtarët-studentë të zgjedhjeve apo komisionit të fakultetit me rekomandim të Kryesuesit të Komisionit zgjedhor në rast të ndonjë shkelje të dëshmuar të rregullave të kësaj rregullore të cilën e bëjnë anëtarët përkatës. Në këtë rast pozita nuk riplotësohet për periudhën gjatë suspendimit.

Neni 15

1. Kryesuesi i Komisionit Zgjedhor është përgjegjës për:
 - thirrjen e takimeve të Komisionit Zgjedhor;
 - udhëheqjen e takimeve;
 - udhëzimin për procesin e vendim - marrjes;
 - përgatitjen e procesverbalit të takimeve;
 - ekzekutimin e vendimeve të Komisionit Zgjedhor;
 - koordinimin e komisioneve të fakulteteve.
2. Kryesuesit të Komisionit Zgjedhor i caktohet një bashkëpunëtor që do t'i ndihmojë në kryerjen e punëve teknike.
3. Rektori i Universitetit është i obliguar që të ofrojë mbështetje të mjaftueshme administrative për Kryesuesin e Komisionit Zgjedhor në mënyrë që t'i përmbushë obligimet e përshkruara nga kjo rregullore sipas periudhave.
4. Në rast se Kryesuesi mungon, përgjegjësitë sipas paragrafit (1) të këtij neni do t'i marrë zëvendës kryesuesi.

Neni 16

Çdo organizatë studentore që kualifikohet për pjesëmarrje në zgjedhjet, sipas kësaj rregulloreje, nominon një vëzhgues në Komisionin Zgjedhor të fakultetit.

Neni 17

1. Në rast të dorëheqjes së hershme të anëtarëve, ashtu si janë listuar në nenin 12 paragrafi pika 2.5 dhe 13 paragrafi 2 pika 2.3 të kësaj Rregulloreje, Këshilli Drejtues kërkon nga Organizatat e Studentëve të caktojnë nominimin e anëtarit brenda periudhës sa më të shkurtër kohore.
2. Në rast të mungesës së kuorumit të Komisionit Zgjedhor, për shkak të mos përcaktimit të nominimit, Kryesuesi i Komisionit Zgjedhor ka të drejtë që të marrë vendime në emër të Komisionit, konform kësaj rregulloreje.

Neni 18

1. Në Komisionin Zgjedhor, prezantojnë: Kryesuesi dhe së paku edhe dy anëtarë me të drejtë vote që të ketë kuorum. Komisioni i fakultetit duhet të ketë të pranishëm kryesuesin dhe së paku dy anëtarë (me të drejtë vote) më shumë për të arritur kuorumin.
2. Në rast se mungon kuorumi, kryesuesi mund të therras një takim tjetër brenda 48 orësh.
3. Në rast se mungon kuorumi gjatë dy takimeve të njëpasnjëshme, kryesuesi e gëzon të drejtën e marrjes së vendimeve për temat e rendit të ditës.
4. Vendimet e Komisionit Zgjedhor dhe të Komisionit të fakultetit merren me shumicë votash.
5. Në rast të votimit të barabartë vota e Kryesuesit të mbledhjes është vendimtare.

Neni 19

1. Kryesuesi obligohet që ta ftojë mbledhjen e Komisionit Zgjedhor në afatin e paraparë sipas kësaj rregulloreje, me së voni (48 orë) pasi të njoftohen për rastin përkatës.
2. Thirrja (ftesa) duhet t'u dorëzohet anëtarëve më së voni (24 orë) ditë para takimit. Hapat e duhur të komunikimit duhet të përdoren. Ftesa duhet të përmbajë rendin e ditës.
3. Secili anëtarë i Komisionit Zgjedhor ka të drejtë t'i parashtrroje kërkesën kryesuesit për ta bërë thirrjen e takimit, duke dërguar me shkrim një argument dhe një rend të ditës. Takime të tilla duhet të thirren brenda tri ditëve pasi të bëhet kërkesa që është dërguar.

Neni 20

1. Procesverbali i takimit përgatitet për çdo takim të Komisionit Zgjedhor dhe të komisionit të fakultetit. Për proceverbal përdoret formulari i protokollit të takimit sipas kësaj rregulloreje.
2. Procesverbali përfshin një përshkrim të shkurtë të progresit të takimit dhe të vendimeve që janë marrë. Procesverbali nënshkruhet nga të gjithë anëtarët prezent të komisionit. Në rast se refuzohet nënshkrimi, emri i anëtarit dhe arsyet duhet të jepen dhe t'i bashkëngjiten procesverbalit.
3. Të gjitha procesverbalet e takimeve nga Komisioni Zgjedhor dhe të Komisionit të fakultetit ruhen nga kryesuesi përkatës i Komisionit Zgjedhor. Nga një kopje për secilin takim i jepet Sekretarit të Përgjithshëm të UPz-së dhe kjo ruhet në arkivin e UPz-së për një periudhë prej (tre) vitesh.

Neni 21

1. Takimi i Komisionit të Fakultetit thirret në bashkëpunim me kryesuesit e Komisionit Zgjedhor dhe kryesuesin e Komisionit të fakultetit.
2. Për udhëheqjen e takimeve të komisionit të fakultetit, rregullat përkatëse të kësaj rregulloreje për Komisionin Zgjedhor do të jenë të vlefshme.

Neni 22

- I. Komisioni Zgjedhor ka këto përgjegjësi:
 - a) përcakton dhe zbaton dinamikën e zgjedhjeve bazuar në dinamikën e aprovuar nga Këshilli Drejtues.
 - b) përgatit listat për zgjedhje të personave me të drejtë zgjedhjeje;

- c) përgatit vendimet rreth kundërshtimeve ndaj listës së zgjedhjeve;
 - d) konstaton numrin e përgjithshëm të mandateve;
 - e) vlerëson listën e kandidatëve;
 - f) kryeson procedurat zgjedhore;
 - g) verifikon identitetin e votuesve;
 - h) konstaton rezultatet e zgjedhjeve;
 - i) jep mandatin për t'i pranuar organizatat dhe kandidatët me të drejtë zgjedhjeje,
 - j) informon kandidatët;
 - k) shpall rezultatet e zgjedhjes;
 - l) ndërron mandatin;
 - m) konstituon Parlamenti studentor;
 - n) konstituon këshillat studentore dhe
 - o) koordinon komisionet të fakulteteve
 - p) certifikon organizatat
2. Lista e organizatave të pranura studentore dhe listat e kandidatëve shpallen publikisht më së voni 14 ditë para ditës së zgjedhjeve.
 3. Rezultatet e zgjedhjeve shpallen publikisht brenda 7 ditëve pas ditës së zgjedhjeve. Mandatet caktohen në kohë të njëjtë.

Neni 23

1. Rektori dhe dekanët e UPz-së janë të obliguar t'i sigurojnë me kërkesë të Komisionit Zgjedhor listën e përfunduar dhe me të gjitha ndryshimet e studentëve që kanë të drejtë vote më së voni 10 ditë pas shpalljes së zgjedhjeve studentore nga Këshilli Drejtues.
2. Studentët me të drejtë vote përmbushin këto dy kualifikime:
 - Të kenë statusin e studentit të rregullt/korrespondencë sipas nenit 143, pika 1.3, të Statutit të UPz-së.
 - Të kenë indeksin/ ID. kartën e UPz-së të vulosur i/e cila dëshmon që studenti është i regjistruar dhe i cili është i vlefshëm për datën kualifikuese të zgjedhjeve ashtu si definohet nga Këshilli Drejtues.
3. Data kualifikuese për listën e studentëve që kanë të drejtë të votojnë do të caktohet 15 ditë para zgjedhjeve.
4. Lista e studentëve që kanë të drejtë të votojnë bëhet publike dhe e qartë për Komisionin Zgjedhor brenda 14 ditëve pasi që zgjedhjet të jenë shpallur nga Këshilli Drejtues deri në 7 ditë para zgjedhjeve.
5. Brenda kësaj periudhe secili student ka të drejtë të ankohet kundër përmbajtjes së listës. Ankesa bëhet përmes deklaratës me shkrim e cila i paraqitet Kryesuesit të Komisionit të Zgjedhjeve.
6. Kundërshtimet ndaj listës me të drejtë vote, paraqiten me së voni 14 ditë para zgjedhjeve dhe po kështu sipas këtyre kundërshtimeve vendoset me së voni 7 para zgjedhjeve.

Lista e kandidatëve

Neni 24

1. Organizatat e studentëve me të drejtë pjesëmarrje në zgjedhje për Parlamentin Studentor apo Këshilla studentore sipas parimeve të kësaj rregulloreje dorëzojnë listat e kandidatëve në Komisionin Zgjedhor përmes postës së regjistruar më së voni 10 ditë para zgjedhjeve, duke

përdorë formularin e Listës së Kandidatëve të përcaktuar nga Komisioni Zgjedhor. Pasi t'i dorëzohet lista Komisionit Zgjedhor, ajo nuk do të ndryshohet më.

2. Çdo listë e kandidatëve përmban:
 - Emrin e organizatës të studentëve që bën fushatë;
 - Organin qeverisës që do të zgjedhet (Parlamentin studentor apo Këshillin e studentëve);
 - Listën prioritare të kandidatëve;
 - Deklaratën e pëlqimit të kandidatëve;
 - Personin e autorizuar të organizatës studentore;
3. Në rast të emrave kontradiktorë të dy apo më shumë organizatave të ndryshme studentore, Komisioni Zgjedhor kërkon nga të adresuarit e autorizuar të secilës organizatë të përfshirë që të gjejnë një zgjidhje së paku 15 ditë para ditës së zgjedhjeve. Në rast se nuk gjendet ndonjë marrëveshje deri në atë datë, Komisioni Zgjedhor vendos dallimin e termeve për secilën organizatë të përfshirë.
4. Organizatat studentore, të cilat kanë qenë të përfaqësuara edhe më parë në përfaqësimin e studentëve të UPz-së, do të kenë të drejtën t'i mbajnë emrat dhe akronimet e tyre.
5. Përdorimi i emrave të partive politike ekzistuese të Kosovës, si emra të organizatave të studentëve nuk lejohet.

Neni 25

1. Lista e kandidatëve e organizatave studentore përbëhet prej maksimumit, sa dyfishi i aq kandidatëve të numrit të përgjithshëm të po aq mandateve të lejueshme që të zgjedhet një organ (trup). Kandidatët tepricë hiqen prej listës nga Komisioni Zgjedhor.
2. Për çdo kandidat, që duhet ta përmbushë kualifikimin sipas nenit 23 (2) ofrohen këto informacione (të dhënat), në mënyrë që kandidatura të jetë e ligjshme:
 - emri dhe mbiemri,
 - vendi i lindjes,
 - data e lindjes,
 - adresa,
 - titulli i studimeve aktive - fakulteti dhe departamenti,
 - numri i indeksit/ ID kartës së studentit,
 - dëshmia e regjistrimit të studentit të rregullt - vula, dhe
 - deklarata e miratimit (pëlqimit).
3. Kandidatët të cilët nuk i përmbushin këto kualifikime për të pasur të drejtë vote sipas nenit 23 paragrafi (2), Komisioni Zgjedhor i heq nga lista e kandidatëve.

Neni 26

1. Në listën e kandidatëve, çdo i treti kandidat i renditur duhet të jetë femër (30% e listës)
2. Për detaje tjera të rregullativave dhe nevojave gjinore të listës së kandidatëve referohet në Ligjin për Barazi Gjinore nr.2004/2.

Neni 27

1. Vlefshmëria e listës së kandidatëve duhet të kontrollohet nga Komisioni Zgjedhor menjëherë pasi të merret nga Organizata studentore.
2. Në rast të parregullsive apo të metave të cilat kërkojnë përmirësim, lista e kandidatëve kthehet prapa te i adresuari i autorizuar i organizatës studentore përkatëse me shpjegimet e nevojshme për përmirësim.

3. Lista e përmirësuar e kandidatëve dorëzohet te Komisioni Zgjedhor nga organizata studentore më së voni 10 ditë para zgjedhjeve.
4. Nëse lista zgjedhore apo lista e kandidatëve, e cila është kthyer për përmirësim nuk dorëzohet brenda periudhës kohore të caktuar kandidatura e organizatës përkatëse studentore njihet si e tërhequr.

Neni 28

1. Çdo organizatë studentore do të ketë të drejtën të tërheqë kandidaturën e saj përmes deklaratës me shkrim, e cila duhet të jetë e nënshkruar nga i adresuari i autorizuar dhe udhëheqësi i organizatës studentore, më së voni 15 ditë para zgjedhjeve.
2. Kandidatura e organizatës studentore do të njihet si e tërhequr, nëse numri i kërkuar i kandidatëve, sipas kësaj rregulloreje nuk është dhënë për arsye se kandidatët kanë tërhequr kandidaturën me shkrim dhe deklaratën e nënshkruar, më së voni 15 ditë para zgjedhjeve.

Neni 29

1. Lista zgjedhore apo lista e kandidatëve e cila dorëzohet jashtë periudhës së caktuar nuk njihet.
2. Për vlerësimin e datës së saktë të dorëzimit, data e pullës postare apo data e dorëzimit personal do të jetë vendimtare.
3. Kryesuesi i Komisionit Zgjedhor është i obliguar të aranzhojë në periudhën para zgjedhjeve një fushatë informuese për studentët me të drejtë vote, duke i informuar për procedurat zgjedhore. Rektorati është i obliguar të ofrojë resurset e nevojshme për një proces të tillë zgjedhor dhe po ato i bën publike.

Mbajtja e zgjedhjeve

Neni 30

1. Qendrat e vendvotimeve në të gjitha njësitë akademike hapen në ora 8.00 dhe mbyllen në ora 18.00, përjashtimisht nga kjo, nëse në kohën e mbylljes së vendvotimeve ka radhë të votuesve, atëherë koha e mbylljes së vendvotimit shtyhet deri në votimin e studentit të fundit.
2. Numrin e vendvotimeve nëpër fakultete e cakton Komisioni Zgjedhor.

Neni 31

1. Rektori është i obliguar që të ofrojë vendvotime të përshtatshme zgjedhore për mbajtjen e zgjedhjeve në secilën ndërtesë të fakultetit. Pajisjet e nevojshme, siç janë kutitë e votimit, kabinat e votimit dhe pajisje të tjera të nevojshme për votim duhet të ofrohen nga Rektori me kërkesë të Komisionit Zgjedhor.
2. Gjatë procesit të zgjedhjeve, në vend votime mund të kenë qasje përveç anëtarëve të Komisionit Zgjedhor (komisionit të fakultetit), këta personat:
 - personeli mbështetës i Komisionit Zgjedhor,
 - vëzhguesit zyrtarë të caktuar për zgjedhje,
 - votuesit, dhe
 - personeli tjetër i caktuar zyrtar, përgjegjës për funksionim të rregullt.
3. Pasi të jetë hedhur vota, votuesit duhet të largohen nga vendvotimi pa vonesë.

4. Nëse paraqitet si e nevojshme për arsye të funksionimit të rregullt të procedurës zgjedhore, kryesuesi i Komisionit Zgjedhor (komisioni i fakultetit) ka të drejtën ta kufizojë qasjen e votuesve në vetëm nga një votues sipas radhës.
5. Në hyrje të vendvotimeve nuk lejohet prezenca e përfaqësuesve të organizatave studentore, përveç atyre që janë cekur në paragrafin 2 të këtij neni.

Neni 32

1. Secili vend votim duhet të ketë së paku një kabinë votimi. Kabina e votimit duhet të vendoset në atë pozicion në mënyrë që votuesi të mos jetë i vëzhguar nga persona të tjerë që janë të pranishëm në vendvotim gjatë procedurës së votimit.
2. Në rast se nuk ofrohen kabina të vendosura dhe të ndërtuara për votim, duhet të adaptohet një pjesë e mjaftueshme e dhomës në mënyrën e përshtatshme. Këto rregullime të përkohshme duhet të pranohen nga Komisioni Zgjedhor bazuar në inspektim individual.
3. Kabina e votimit përmban tavolinën me ulëse të lartë apo me banak të lartë, të ketë dritë të mjaftueshme dhe të ofrojë material për shkrim për të bërë votimin në fletë votim.

Neni 33

1. Fletëvotimet për Këshille Studentore dhe për Parlament Studentor duhet të dallohen përmes ngjyrës nga njëra tjetra.
2. Fletëvotimet palohen së paku njëherë para se të hedhën në kutin e votimit.

Neni 34

Komisioni Zgjedhor (komisioni i fakultetit) është përgjegjës për mbajtjen e procedurave zgjedhore në pajtueshmëri me rregulloren për zgjedhje.

Neni 35

1. Votimi bëhet në formë personale. Të verbërit, personat me aftësi të kufizuara, nga të cilët nuk pritët që të mund të votojnë në mënyrë vetanake, kanë të drejtën të zgjedhin një person përcjellës, i cili do t'i mbështesë ata /ato gjatë procedurës së zgjedhjes.
2. Përveç përjashtimit nga paragrafi (1) të këtij neni, në kabinën e votimit mund të hyjë vetëm nga një person sipas radhës.

Neni 36

1. Çdo votues është i obliguar ta dëshmojë identitetin e tij / saj para Komisionit Zgjedhor (komisionit të fakultetit) përmes paraqitjes së indeksit / ID kartelës ose letërnjoftimit.
2. Vlerësimi i pranueshmërisë bëhet ekskluzivisht në bazë të listës zgjedhore për personat që kanë të drejtë votimi.

Neni 37

1. Kryesuesi i Komisionit Zgjedhor (komisioni i fakultetit) ia jep në dorë studentit fletën votuese.

2. Çdo student me të drejtë vote ka të drejt të votojë për:
 - a) Parlamentin studentor të Universitetit,
 - b) Këshillat e studentëve në të gjitha fakultetet aty ku ai/ajo është listuar si student me të drejtë vote.
3. Kryesuesi i Komisionit Zgjedhor (komisioni i fakultetit) drejton votuesin për të hyrë në kabinën e votimit.
4. Votuesi e mbush fletë votimin, e palos njëherë dhe del jashtë kabinës së votimit.
5. Kryesuesi i Komisionit Zgjedhor tërheq mbulesën e kutisë së votimit dhe votuesi e fut fletëvotimin e palosur në kuti të votimit.
6. Në rast se ndodh ndonjë gabim nga votuesi gjatë mbushjes në fletë votim, Komisioni Zgjedhor (komisioni i fakultetit) është i obliguar të ofrojë edhe një fletë votim për votuesin me kërkesën e votuesit. Fletë votimi paraprak griset nga votuesi para dorëzimit në prani të Komisionit Zgjedhor (komisionit të fakultetit).
7. Dorëzimi i fletëvotimit shtesë regjistrohet në protokoll të votimit.

Neni 38

1. Emri i votuesit i cili ka hedhur votën, duhet të regjistrohet në regjistrin e votimit nga një anëtar i Komisionit Zgjedhor (komisionit të fakultetit). Për regjistrim përdoret formulari të cilin e përcakton Komisioni Zgjedhor për regjistrimin e votimeve të kësaj rregulloreje.
2. Emri duhet të regjistrohet me numrin sipas rreshtit dhe me numrin origjinal të listës së votuesve me të drejtë vote.
3. Anëtar i tjetër i Komisionit Zgjedhor (komisionit të fakultetit) duhet të evidentojë emrin e votuesit në listën e votuesve me të drejtë vote.

Neni 39

Votimi duhet të regjistrohet me vulë në anën e prapme të brendshme të indeksit nga një anëtarë i Komisionit Zgjedhorë (komisionit të fakultetit).

Neni 40

1. Në rast të dyshimit sa i përket identitetit të studentit, Komisioni Zgjedhor ka të drejtë të kërkojë dokumente shtesë të identifikimit.
2. Nëse identiteti nuk mund të qartësohet, studenti nuk lejohet të votojë.
3. Pasi të dorëzohet fletëvotimi, asnjë dyshim tjetër sa i përket identitetit të votuesit nuk është ligjërish i lejueshëm.

Neni 41

1. Për fletëvotim mund të përdoret formulari i fletëvotimit i përcaktuar nga Komisioni Zgjedhor i zgjedhjeve. Fletëvotimet duhet të përmbajnë informacione në të tri gjuhë (shqip, anglisht dhe serbisht), ndërsa në Fakultetin e Edukimit edhe në gjuhën turke dhe boshnjake.
2. Varësisht nga organi që do të zgjidhet, mund të përdoren ngjyra të ndryshme të fletë votimeve ashtu siç do të vendoset nga Komisioni Zgjedhor.
3. Renditja e organizatave studentore në fletë votim duhet të përcaktohet përmes hedhjes së shortit (lotarisë) e cila mbahet nga Komisioni Zgjedhor.

4. Shtypja e fletë votimeve duhet të aranzhohet nga Kryesuesi i Komisionit Zgjedhor në kohën e duhur dhe pasi të shpallen listat zgjedhore, sipas dinamikës së përcaktuar nga Këshilli Drejtues.

Neni 42

Fletëvotimi njihet si i vlefshëm, nëse aty ka evidencë të padiskutueshme për organizatën studentore apo kandidatin të cilin votuesi e ka zgjedhur. Ky është rasti kur votuesi markon qarkun në të majtë të emrit të organizatës së pranueshme apo kandidatit me një iks (x) apo shenja tjera të kësaj natyre, në mënyrë që qëllimi i votuesit për të zgjedhur këtë organizatë apo kandidat të shihet me qartësi.

Neni 43

1. Fletë votimi njihet si i pavlefshëm, nëse:
 - a). Përdorët edhe një fletëvotim përveç fletëvotimit të rregullt,
 - b). Atëherë kur fletëvotimit i shqyhet një pjesë në atë mënyrë që nuk do të ketë mundësi të qartësohet se cila organizatë studentore apo kandidatë është zgjedhur,
 - c). Atëherë kur asnjë organizatë studentore apo kandidatë nuk është markuar,
 - d). Atëherë kur dy apo më shumë organizata studentore apo kandidatë janë markuar,
 - e). Atëherë kur markimet apo shenjat në fletë votime janë bërë në atë mënyrë që nuk mund të vërehet asnjë përcaktim i organizatës studentore apo kandidat dhe nga e cila nuk mund të nxirret asnjë përfundim.
2. Fjalët, komentet apo shenjat tjera të cilat markohen në fletëvotim, nuk e çrregullojnë vlefshmërinë e fletë votimit, përveç nëse është e ngjashme dhe rrjedh nga rastet e renditura më lartë.

Neni 44

1. Pasi që të përfundojë periudha zgjedhore, Kryesuesi i Komisionit të zgjedhjeve (Komisioni i Fakultetit), deklaron përfundimin e votimeve. Vendvotimi mbyllet vetëm nga anëtarët e Komisionit Zgjedhor (Komisionit të Fakultetit), personelit mbështetës dhe vëzhguesve të cilët mbeten në dhomë.
2. Komisioni Zgjedhor (Komisioni i Fakultetit) përzier fletëvotimet në kutin e votimit, pastaj i zbraz dhe i numëron:
 - a). Numrin e përgjithshëm të fletëvotimeve për secilin organ të hedhura nga votuesit,
 - b). Numrin e përgjithshëm të votuesve të regjistruar në regjistrorët e votimeve,
 - c). Në rast të mos përputhjes së rezultateve sipas pikës 1 dhe 2 të këtij paragrafi, identifikohet arsytet e kësaj mospërputhjeje.
3. Komisioni Zgjedhor (Komisioni i Fakultetit), shpalos fletëvotimet, i rregullon ato sipas organit të pranueshëm, kontrollon vlefshmërinë, identifikon fletëvotimet epavlefshme sipas numrit të radhës dhe e përcakton:
 - a). Numrin e përgjithshëm të votave të hedhura,
 - b). Numrin e përgjithshëm të votave të hedhura të pavlefshme,
 - c). Numrin e përgjithshëm të votave të hedhura të vlefshme, dhe
 - d). Numrin e përgjithshëm të votave të vlefshme për secilën organizatë studentore apo kandidat.
4. Rezultatet sipas pikës (3) të këtij neni duhet të transferohen te Kryesuesi i Komisionit Zgjedhor në kopje fizike, menjëherë pas numrimit të votave.

Neni 45

1. Komisioni Zgjedhor (Komisioni i Fakultetit) protokollon procedurën zgjedhore dhe rezultatet e zgjedhjeve në një raport, të cilin brenda 24 orëve pas mbylljes së vendvotimit, duhet ta dorëzojë në Komisionin Qendror Zgjedhor. Për protokoll duhet të përdoret formulari i Protokollit të procedurës së zgjedhjeve të përcaktuar nga Komisioni Qendror i zgjedhjeve.
2. Raporti përmban:
 - a). Emrin e vendvotimit dhe datën e votimit,
 - b). Emrat e anëtarëve të Komisionit Zgjedhor prezent,
 - c). Emrat e vëzhguesve prezent,
 - d). Numrin e saktë të fletëvotimeve të dorëzuara për secilin organ që është në zgjedhje,
 - e). Koha e fillimit dhe e mbarimit e periudhës së zgjedhjeve,
 - f). Vendimet potenciale të Komisionit të zgjedhjeve (Komisionit i Fakultetit) sa i përket lejimit apo moslejimit të votuesve për votim.
 - g). Vendime tjera të Komisionit Zgjedhor (Komisionit i Fakultetit) gjatë periudhës së zgjedhjeve (p.sh. pengimet gjatë periudhës së zgjedhjeve, votimet përmes përcjelljes mbështetëse të ndonjë personi etj.).
3. Të bashkangjiturat këtij raporti i shtohen:
 - a). Lista e votuesve me të drejtë vote,
 - b). Regjistri i votimit,
 - c). Votat e pavlefshme, të ndara, paketuara dhe të markuar për secilin organ apo kandidat që është në zgjedhje.
 - d). Votat e vlefshme, të ndara, paketuara dhe të markuar për secilin organ apo kandidat që është në zgjedhje.
 - e). Fletëvotimet e pa shfrytëzuara, të ndara, të paketuara dhe të markuara.
4. Raporti duhet të nënshkruhet nga të gjithë anëtarët e pranishëm të Komisionit Zgjedhor (Komisionit të Fakultetit) dhe vëzhguesve. Në rast të refuzimit të nënshkrimit, arsyet duhet të evidentohen në këtë raport.

Neni 46

1. Në rast të rrethanave të veçanta apo incidenteve përreth Komisionit Zgjedhor (komisionit të fakultetit), Komisioni Zgjedhor ka të drejtë ta ndërprejë periudhën zgjedhore dhe ta shtyjë në një ditë tjetër zgjedhore.
2. Secila shtyrje e zgjedhjeve shpallet në publik pa vonesë nga Kryesuesi i Komisionit Zgjedhor (Komisioni i Fakultetit).
3. Nëse periudha votuese vetëm ka filluar dhe pastaj pengohet, të gjitha veprimet zgjedhore, fletëvotimet dhe kutitë e votimit duhet të mbyllën nga Kryesuesi i Komisionit Zgjedhor (Komisionit i Fakultetit) derisa procedura zgjedhore të vazhdohet.

Neni 47

1. Shpërndarja e mandateve kalkulohet nga Komisioni Zgjedhor në pajtueshmëri me rregullat e kësaj rregulloreje.
2. Për shpërndarjen e mandateve, nënshkruhet një formular për dhënien e mandateve të cilin e përcakton Komisioni Zgjedhor.

Neni 48

1. Rezultati preliminar i zgjedhjeve publikohet nga Kryesuesi i Komisionit Zgjedhor, me së largu 48 orë pas përfundimit të zgjedhjeve.
2. Rezultati përfundimtar i zgjedhjeve publikohet nga Kryesuesi i Komisionit Zgjedhor, më së largu 10 ditë pas përfundimit të zgjedhjeve.
3. Shpallja përmban:
 - a). Rezultatit e zgjedhjeve në shifra, të renditur sipas organizatës studentore dhe kandidatit,
 - b). Numrin e përgjithshëm të mandateve për secilin organizatë të pranueshme studentore,
 - c). Listën e kandidatëve për secilin organ.

Neni 49

1. Mandatarët e zgjedhur informohen nga Kryesuesi i Komisionit zgjedhor brenda dy ditësh pasi të jetë shpallur rezultati përfundimtar zgjedhor.
2. Për letrën informuese mund të përdoret formulari për njoftimin e Mandatarëve të cilin e përcakton Komisioni Zgjedhor.
3. Mandati duhet të njihet si i pranuar, nëse mandatarin nuk e kundërshton zgjedhjen e tij brenda katër ditëve pasi që rezultati i zgjedhjeve të jetë shpallur.
4. Në rast të kundërshtimit të mandatit nga mandatarin, mandati duhet t'i caktohet kandidatit vijues sipas radhës së listës së kandidatëve.

Neni 50

1. Kundërshtimet ndaj procedurave dhe rezultateve të zgjedhjeve të studentëve dorëzohen te Komisioni i Zgjedhjeve brenda 72 orëve pasi të jenë shpallur rezultatet e zgjedhjeve.
2. Ankesat eventuale të studentëve dhe organizatave studentore ndaj rezultateve zgjedhore, shqyrtohen dhe vendosen nga Komisioni Zgjedhor brenda 5 ditëve pas pranimit të tyre.
3. Kundërshtimet për arsye të shkeljeve të rregullave të kësaj rregulloreje nga Komisioni Zgjedhor duhet të shqyrtohen dhe të vendosen nga Këshilli Drejtues si shkallë e dytë, brenda 2 javëve pas shpalljes së rezultateve përfundimtare.
4. Në rast se zgjedhjet deklarohen të pavlefshme, zgjedhjet e tjera duhet të mbahen dhe caktimi i mandateve duhet të suspendohet.
5. Çdo ndryshim në rezultatit e zgjedhjeve për arsye të pranimit të ankesave duhet të shpallet publikisht nga kryesuesi i komisionit zgjedhor.
6. Vendimi i Këshillit Drejtues është përfundimtar.

Neni 51

1. Nëse Këshilli Drejtues konstaton se shkeljet e procedurave zgjedhore kanë qenë të atyre përmasave që esencialisht kanë ndikuar në rezultatit zgjedhor, atëherë zgjedhjet duhet të përsëriten për arsye të ankesave të bazuara dhe të pranuar. Zgjedhjet atëherë duhet të përsëriten brenda 15 ditëve pasi që vendimi i Këshillit Drejtues të jetë i vlefshëm. Ditët e pushimeve duhet të hiqen nga kalkulimi i kësaj periudhe.
2. Zgjedhjet nuk përsëriten gjatë periudhës së pushimit.
3. Për zgjedhjet e përsëritura, duhet të përdoret lista origjinale e zgjedhjeve dhe e kandidatëve.

Neni 52

Për të gjitha aspektet të cilat nuk rregullohen me këtë rregullore duhet t'i referoheni Statutit të Universitetit "Ukshin Hoti" në Prizren dhe Ligjit mbi Arsimin e Lartë të Kosovës.

Neni 53

1. Obligohet Komisioni Zgjedhor që të raportoj në mënyrë të rregullt në Këshillin Drejtues mbi ecurinë e procesit zgjedhor të zgjedhjeve studentore ku raporti duhet të dorëzohet me shkrim në sekretarinë e Këshillit Drejtues dhe me kërkesën e Këshillit Drejtues, përfaqësuesi i KQZ-së jep sqarime për anëtarët e Këshillit Drejtues mbi ecurinë e procesit të zgjedhjeve sipas dinamikës së paraparë.
2. Të gjitha vendimet apo veprimet të cilat bien ndesh apo paraqesin kundërligjshmëri me Ligjin e Arsimin të Lartë të Kosovës, Statutin e UPZ-së si dhe aktet normative të zbatueshme të Republikës së Kosovës, Këshilli Drejtues bazuar në kompetencat e tij konform Statutit si autoriteti kryesor qeverisës i Universitetit mund t'i anulojë dhe ti shpallë të pavlefshme.
3. Interpretimi autentik i kësaj rregullore mund të jepet nga Këshilli Drejtues.
4. Në rastet kur kemi vakancë apo zbratësi ligjore të kësaj rregullore apo të akteve të brendshme të Universitetit të cilat e rregullojnë këtë çështje, Këshilli Drejtues bazuar në kompetencat e tij si organi kryesor qeverisës i Universitetit me vendim të veçantë rregullon çështjet specifike sipas nevojës së kërkuar.
5. Ndryshimet dhe plotësimet e kësaj Rregulloreje bëhen me procedurë të njëjntë si të miratimit të saj.
6. Me hyrjen në fuqi të kësaj rregullore në ditën e miratimit nga Këshilli Drejtues i Universitetit, shfuqizohen të gjitha rregulloret, vendimet apo udhëzimet e tjera të mëparshme të kësaj natyre.

Neni 54

Kjo rregullore hyn në fuqi në ditën e miratimit nga Këshilli Drejtues i Universitetit "Ukshin Hoti" në Prizren më datë 09.02.2018.

Kryesues i Këshillit Drejtues


Prof. asoc. dr. Bedri Muhadin

